

veret, & tranquillitatem, fiduciamque in istas regiones reduceret & revocaret : opus sanè ipso Cæsare dignum, & ejus imperii gloriæ consentaneum, pro quo promptos se illi, ac paratos esse exhibebant ad se suasque fortunas omnes devovendas, prout patet ex hujusmodi pluribus ordinum expostulationibus, quæ litteris consignatæ, typisque euiam vulgatæ passim circumferuntur.

Jàm verò quod vos, dilecti filii noster, ac VV. fratres, jure ac merito optabatis, quodque tantoperè ordines omnes postulabant, id sponte sud exhibet nunc Cæsar ipse; cùm nobis jam significaverit, declarasse se ac declarare sine ullâ conditione, ut integrum esse debeat episcopis suorum jurium omnium exercitium in seminariis episcopalibus, & in cæteris rebus ecclesiasticis; ità ut omnia ad pristinum in quo erant, statum revertantur. Quod quidem declarationis genus Cæsaris pietate freti speramus fore, ut ad cæteras quoque ditiones suas quàm latissimè dimanet ad Religionis utilitatem, quod nostræ omnes sollicitudines spectant, semperque spectabunt. Itemque nos certiores fecit, se declarasse nullâ adjectâ conditione, ut integra atque intacta servari debeant cùm ordinibus, tum populis sua jura, privilegia & constitutiones, rebus omnibus ad priorem statum ità redactis ac restitutis, ut maximè istorum populorum votis satisfactum sit; nec non & in universum omnibus, & seorsum cuilibet promissâ anteaclarum rerum oblivione, quæ nullis septa limitibus teneatur. Ob quas præcipuè causas significavit nobis, se istuc suum aulae & statûs vicecancellarium ablegasse, majoribus amplioribusque præditum facultatibus, quod opus hoc magnum reconciliationis ac pacis confici ab solvique quàm citissimè possit.